

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya

No. Telefon : 03-8882 5562
No. Fax : 03-8882 5569

KOMUNITI PENGGUNA DAN PENIAGA SAMBUT BAIK KEBENARAN RENTAS NEGERI SELURUH NEGARA

PUTRAJAYA, 11 Oktober 2021 – Kementerian Perdagangan Dalam Negeri dan Hal Ehwal Pengguna (KPDNHEP) menyambut baik pengumuman Perdana Menteri, YAB Dato' Seri Ismail Sabri Yaakob pada 10 Oktober 2021, memberi kebenaran merentas negeri bagi Keluarga Malaysia yang telah menerima vaksinasi lengkap.

2. Kebenaran merentas negeri ini dilihat sebagai satu lagi langkah positif Kerajaan ke arah merencanakan pemulihan ekonomi negara terutama ekonomi domestik dan khususnya sektor pengedaran dan peruncitan. Sektor perdagangan pengedaran merupakan antara aktiviti ekonomi utama dalam negara dan telah menyumbang sebanyak 16% kepada Keluaran Dalam Negara Kasar (KDNK) atau RM311.6 bilion nilai jualan pada suku kedua 2021. Sebagai makluman, sektor pengedaran dan peruncitan telah dibuka sepenuhnya, namun masih perlu mematuhi *Standard Operating Procedure* (SOP) yang telah dikeluarkan oleh Majlis Keselamatan Negara (MKN) dalam membendung penularan Covid-19.

3. Sehubungan dengan itu, KPDNHEP ingin mengumumkan bahawa semua perniagaan dalam sektor perdagangan pengedaran di bawah seliaan KPDNHEP **tidak lagi memerlukan surat kebenaran beroperasi melalui Sistem Covid-19 Information Management System (CIMS)**. Walau bagaimanapun, setiap sektor masih lagi tertakluk kepada SOP Pelan Pemulihan Negara (PPN) semasa, terutamanya bagi negeri-negeri yang masih di dalam PPN Fasa 2 dan 3.

4. Semua ahli Keluarga Malaysia, pengguna dan peniaga juga dinasihatkan untuk menjadi pengguna bijak dan berhemat dalam berbelanja dengan melaksanakan strategi pembelian seperti merancang pembelian, lokasi dan waktu pembelian bagi memaksimumkan penjimatan. Utamakan kualiti dan sentiasa membuat perbandingan harga dan membeli dari premis yang menawarkan harga yang berpatutan.

5. Selain itu, Keluarga Malaysia juga diingatkan agar tidak bersikap sambil lewa terhadap kelonggaran yang diberikan. Pasti semua telah melalui kesusahan dan keperitan dalam mematuhi langkah-langkah yang terpaksa diambil kerajaan semasa pandemik seperti Perintah Kawalan Pergerakan (PKP) dan ianya tidak harus berulang disebabkan kelalaian ahli Keluarga Malaysia dalam mematuhi SOP yang telah ditetapkan. Ini penting dalam usaha membantu negara dalam pembukaan semula ekonomi serta persediaan menjalani kehidupan fasa endemik dengan selamat atau *Reopening Safely*.

6. Untuk itu, Penguat Kuasa KPDNHEP akan meneruskan pemeriksaan dan penguatkuasaan pematuhan SOP menerusi Ops Samar di mana pegawai penguatkuasa akan berpakaian biasa (tidak berpakaian seragam) bagi memastikan premis-premis perniagaan dan orang ramai mematuhi SOP yang telah ditetapkan bagi mencegah penularan wabak Covid-19.

###

YB Dato Sri Alexander Nanta Linggi
Menteri Perdagangan Dalam Negeri Dan Hal Ehwal Pengguna
PUTRAJAYA, 11 Oktober 2021

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) ditubuhkan pada 27 Oktober 1990. Matlamat penubuhan kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran.

Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampai sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkap dan ke arah self-regulated, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusan, dan hasilnya adalah negara yang seimbang dari segi ekonomi dan sosial.

Agensi-agensi di bawah KPDNHEP:

